



Broj:

Sarajevo, 04.11.2020. godine

PARLAMENTARNA SKUPŠTINA BOSNE I HERCEGOVINE  
PREDSTAVNIČKI DOM

n/r predsjedavajućeg, gđin. Nebojša Radmanović

BOSNA I HERCEGOVINA  
PARLAMENTARNA SKUPŠTINA BOSNE I HERCEGOVINE  
SARAJEVO

PRIMLJENO:	05-11-2020		
Organizaciona jedinica	Klasifikaciona oznaka	Redni broj	Broj strana
	01-50-1-1	2174/20	

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

### ПОСЛАНИЧКУ ИНИЦИЈАТИВУ

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u roku od 30 dana od dana usvajanja ove inicijative, pripremi i u parlamentarnu proceduru uputi Prijedlog zakona o mjeriteljstvu Bosne i Hercegovine i Prijedlog zakona o zvaničnom vremenu u Bosni i Hercegovini, kako bi se blagovremeno realizirale obaveze iz Programa rada Vijeća ministara Bosne i Hercegovine za 2020. godinu.

### Образложење

Vijeće ministara Bosne i Hercegovine je na 14. sjednici održanoj 29.07.2020. godine usvojilo Program rada Vijeća ministara Bosne i Hercegovine za 2020. godinu. Navedeni Program rada dostavljen je Parlamentarnoj skupštini Bosne i Hercegovine dana 11.09.2020. godine. Pod tačkom 2.1.7.1. predmetnog Programa rada navedeno je sa rokom realizacije „prvi i četvrti kvartal 2020. godine“ sačinjavanje Zakona o zvaničnom vremenu u Bosni i Hercegovini i Zakona o mjeriteljstvu Bosne i Hercegovine. Zakon o mjeriteljstvu uvršten je i u Srednjoročni program rada Vijeća ministara Bosne i Hercegovine za period 2020.-2022. godina pod tačkom 2.1.3. Zakon o zvaničnom vremenu u Bosni i Hercegovini neophodan je kako bi se definisalo zvanično vrijeme u Bosni i Hercegovini, te način računanja, realizacije i upotrebe zvaničnog vremena na teritoriji cijele Bosne i Hercegovine. Bosna i Hercegovina trenutno nema propis koji reguliše ovo pitanje i zbog toga se usvajanje ovog Zakona sa pravom očekivalo u prvom kvartalu 2020. godine. Međutim, do danas takav Prijedlog zakona nije dostavljen i ova inicijativa ima za cilj da motiviše Vijeće ministara da započne sa dostavljanjem planiranih zakonskih rješenja u parlamentarnu proceduru, posebno imajući u vidu da se bliži kraj 2020. godine. Ovaj Zakon u svakom slučaju treba imati oznaku „E.I“, jer je intencija Bosne i Hercegovine prema Sporazumu o stabilizaciji i pridruživanju da prati i transponira pravnu stečevinu EU, a poznato je da je Evropski parlament izglasao ukidanje pomjeranja sata od aprila 2021. godine, a zemljama Evropske unije i potencijalnim članicama bit će ostavljeno hoće li zadržati ljetno ili zimsko računanje vremena.

Kada je riječ o Zakonu o mjeriteljstvu Bosne i Hercegovine, radi se o sistemskom zakonskom rješenju koje također treba imati oznaku „E.I“, kako bi Bosna i Hercegovina konačno i u ovoj oblasti počela implementirati *acquis* Evropske unije. Naime, ovim Zakonom stavili bi se van snage Zakon o mjernim jedinicama Bosne i Hercegovine i Zakon o osnivanju Instituta za mjeriteljstvo Bosne i Hercegovine i oblast mjeriteljstva riješila bi se na jedan koherentan i sveobuhvatan način. Jačanjem oblasti mjeriteljstva i transparentnosti mjeriteljskog sistema, promovira se i jača konkurentnost domaće privrede na EU tržištu i globalno. Implementiranjem ovakvog pravnog okvira uspostaviti će se garancija za pouzdana mjerenja u Bosni i Hercegovini, doprinosi se jačanju infrastrukture kvaliteta, te se omogućavaju povoljniji trgovinski sporazumi. Problem je također i činjenica da je postojeći Zakon o mjeriteljstvu Bosne i Hercegovine iz 2001. godine, a terminologija iz oblasti mjeriteljstva doživjela je velike promjene u proteklih 20 godina s obzirom na ubrzan razvoj ove oblasti na globalnom planu. Sve navedeno opravdani su razlozi zbog kojih bi trebalo što prije da od Vijeća ministara Bosne i Hercegovine dobijemo sveobuhvatan Prijedlog zakona o mjeriteljstvu i da realiziramo još jednu međunarodnu obavezu Bosne i Hercegovine.

S poštovanjem,

  
Dr. Denis Zvizdić